

رقصه

بعد دقيقه ونص
راح تقسم نفسها نصين
نص ح يرحل ويأ سحابه
وقفاله ع الشباك
ونص ح يسكر أحياناً
ويللمم أحزانه بهدوء
مع دمه غبيه
خرجت عريانه
ف وجود أغراب.

قبل الموعد بدقيقه
شافت إنها أول راجل ف حياتها
وانبهرت برجوله كانت مدسوسه جواها
ومخببها الصدر الناهد
واللون الفيروزي الخايف ف عنيا
والتنهيده السخنه
اللي اندلقت
على طرف قميصها البارد.

عرفت إن الراجل
كان ضل مزيف ع الحيطه
لا بينفع ولا بيضر
زي التعاويذ الهربانه من دجال
وزي الأحلام الوردية
اللي بتبرك
مع أول مطلع.

نفضت أحاسيسها الباهته
وفضلت ترقص
على أنغام طالعها من جواها
وخارجها من الجدران
وساعة الحيط.
ترقص ..
وتوحد خطوتها
مع ضيف جاي يصحبها
خارج هندسة القوانين.

كان لازم تخرج من جنازتها السريه
وتعدّي الخط الفاصل
بين الغامض والمحسوس
وتشد سيفون الحمام على أي اعتبارات
كان لازم تسند نفسها من تاني
وتحس بهمس الليل
وطراوة الفجر
وعفوية عاشق بيعض لسانها

وشراسة نقطة دم
بتصرخ جواها
كان لازم تنهض من غفوتها
وتجدد نفسها بمشيئه جديده
ونظرة جديده
وكلام ح تقوله
لصفحه وحيده
بتنادي عليها.

ف اللحظة الحاسمه
ضربت وشها ف مرآة التسريحه
ورسمت بالدم صورتها
وحطت بسمه لطيفه
وشوية احتمالات.

ف اللحظة الثانيه
نطقت بكلام
عمرها ما تصورت إنها ح تقوله
أو حتى تفكر فيه
واعترفت إنها كانت
أغبي من زهره على فستان
ووحيده كشجره بدون عصافير
حست إن العمر
أقصر من لحظه نسيتهها ف الأتوبيس
وإن العالم
ثانيه بثانيه
بيششق جواها.